

Kalesia

Naoa itəm Pol təməte tuwın kəm iəfak mın ikin Kalesia

Nəghatən əkuəkir rəha naoa u Kalesia

?Pah təməte naoa u? Aposol Pol təməte naoa u.

?Təməte tatuwın kəm pah? Təməte tatuwın kəm niməfak mın itəm kotatig pis ikin e nıtən Kalesia, inu Ikoniam, Listra, ne Tepe. Pol in təmətuoun niməfak mın əh nian in təmaupən maliwək e rəhan naliwəkən mın.

? Nəmegəhən tahro nulan nian təməte? Nəratən asol kit e niməfak e nian əh rəha Pol. Netəm Iaihlua tepət koatən nıpahrienən e Iesu Kristo. Kən netəm Isrel tepət koatən nıpahrienən e Iesu. Məto netəm Isrel neen koatən məmə Iaihlua mın itəm kotən nıpahrienən e Iesu, okotəkəike kətəu-pən lou mın rəha Moses, tahmen e nəhg-ipənən. İlat kəmoatən məmə Iaihlua mın okəkəike kəhg-ipən ilat okəmə kətolkeike məmə okotuwa kətuatip e niganəmti Uhgın.

? Təməte naoa u o naka? Pol in təməte naoa u, məmə otəg-ətuatip-in nətəligən rəha netəm Isrel itəm koatən məmə Iaihlua mın okotəkəike kətəu-pən lou rəha Moses okəmə ilat kətolkeike məmə Uhgın in otosmegəh ilat. Pol tolkeike məmə iəfak mın okotitun məmə nahatətən in suatip itəm Uhgın təmol məmə etəmim otətuatip e niganəmtin, kən in tatosmegəh ilat e nıkin agien. Məto nolən rəha nəhg-ipənən, o nolən rəha wək əskasik mın, o nolən rəha nətəu-pənən

lou, kəsotəsmegəhən etəmim. Netəm-iasol rəha niməfak rəha Isrel kəmoatəpələh əpəh Jerusalem moatəghat-in nətəligənən mīn əh. Kən moatən māmə təwir əm māmə Iaihlua mīn okəsotətəu-pənən lou rəha Moses. Afīn e Wək Mīn 15:1-35.

Pol təmātuoun matəghat kəm ilat

¹⁻² Piak mīn ne wīnik mīn itəm nəkoatəfak latuənu pīsīn pīsīn mīn ikin Kalesia, io Pol, io aposol kit rəha Ughin, ekatəte naoa u, mītahl-ipīnə kəm itəmat. Io ne piatat mīn neen itəm koatəfak u ikin-u, ekotolkeike māmə ekotən “təwir” kəm itəmat. Io u inu, itəm Iesu Kristo ne Tata Ughin kəmialəs-ipər io māmə io rəhalau aposol. Ughin u, in təmiləs-ipər Iesu taiir-pa mīn e rəhan nīmīsən. Sənəmə etəmim əpnəpīn əm kit təmaun-in io kən mīləs-ipər io, mətə Ughin. !Tol nəhlan, onəkotəkəike motəto!

³ Pəs Ughin, u Tata rəhatat, ne Iesu Kristo, u Iərəmərə rəhatat, ilau okuawte-in nəwīrən rəhalau kəm itəmat kən muələhəu nəməlinuən tətətig otəmat. ⁴ Iesu Kristo təmegəhan-in atip māmə in otīmīs o nolən rat rəhatat, kən mīuw rəkīs itat e nolən rat mīn ne nətəligən rat mīn rəha nətueintən. In təmīmīs mətə-inu Tata Ughin tolkeike māmə in otol mihin. ⁵ Tol nəhlan, təwir mə kitat okotənwiwi pīk Ughin u rəhatat, tatuwīn, matuwīn, namnun tikə. Əwəh. Pəs otol mihin.

Namnusən Təwir kitiah əm

⁶ Narmək təmiwig pīk otəmat mətə-inu roiu agin-əh huə Ughin təmaun-in pap itəmat e nəwīrən rəha Iesu, təmawte-in-pīnə əpnəpīn əm kəm itəmat. Mətə roiu itəmat nakotapəs Ughin, moatagīm,

moatətəu-pən nəghatən eiueiua min. ⁷ Nəghatən min əh sənəmə Namnusən Təwir rəha Uhgīn. Netənim neen kəmotəuhlin Namnusən Təwir rəha Uhgīn moatən in pisin, kən katən məmə in namnusən təwir, kən katiuw kalin itəmat lan, kən katərəkīn rəhatəmat nətəligən lan. !Məto Namnusən Təwir kitiaḥ əm, kən kit min tikə! ⁸ Nat əpnəpin okəmə io, o nagelo kit rəha nego e neai tətəmnus-iarəp nəghatən pisin kit min, itəm təsahmenən e inun emotən-iarəp rəkis kəm itəmat aupən, pəs Uhgīn otiles-ipən e Nigəm Asol. ⁹ Kən ekisimatip min, matən məmə, okəmə suah kit otəmnus-iarəp nəghatən pisin u, təsahmenən e Namnusən Təwir itəm itəmat ninəmotitun rəkis, pəs Uhgīn otiles-ipən e Nigəm Asol.

¹⁰ Rəhak nəghatən əh in təskasik, kən nat əpnəpin əm okəmə netənim neen kəsotəgienən ron io. Iəkolkeike əm məmə niki Uhgīn otəgien o nəghatən rəhak. Okəmə iatəghat əh məmə netənim neen nikilat otəgien ron io, kən ko sənəmə io iolwək pahrien kit rəha Kristo.

Uhgīn Təmaun-in Pol

¹¹ Piak min ne winik min, əkolkeike mə ekən-ipinə ətuatip kəm itəmat məmə Namnusən Təwir itəm iatən-iarəp nian rafin sənəmə nat kit itəm təmisi-pən e nətəligən rəha etənim əm.

¹² Namnusən Təwir u, sənəmə suah kit təmos-ipa kəm io, kən məgətun io lan, məto Iesu Kristo əm in təmerəh e rəhk-kapə.

¹³ Itəmat ninəmotitun rəkis rəhak nolən min itəm emətol aupən e nian ematəfak itəmat netəm Isrel.

Kən emən mə oekoh rafin netəmim min rəha Iesu, mərəkin-ərəkin agin niməfak, kən matol nalpınən əskasik kəm ilat. ¹⁴ E nian əh, io ematətul-iəkis o nəukət kastom rəha netəm Isrel, itəm rəhak pipi min kəmotəgətun io lan aupən. Emitun taprəkis-in io min neen, itəm emotaiir ahmen.

¹⁵ Nat əpnapın ematərəkin pap rəhan min netəmim, məto Uhgın təmasəkitun io. Aupən ikin təmitəpun kən mawle rəkis io e nian emətatig əh e nərpı rəhak mama. Kən təmuwa e nian ətuatıp rəhan, in təmaun-in io mə ekuwa io, rəhan etəmim. ¹⁶ Kən Uhgın təmerəh e rəhk-kapə, məgətun io e nətin Iesu, məmə oekitun wir in, kən muwın mamnus-iarəp Namnusən Təwır rəhan kəm netəm min u sənəmə ilat netəm Isrel, katən ilat məmə İaihlua min. E nian əh, io eməsuwınən mehm suah kit mə otəgətun io e Namnusən Təwır əh. ¹⁷ Kən io eməsuwınən əpəh ilis Jerusalem məmə oekəhm netəm min u kəmoatol aposol aupən. Eməsuwınən mə okotəgətun io e Namnusən Təwır rəha Iesu. E nian əh, io eməsou-pis-pən əpəh ikin kit Arepia, kən matig mitəlig-pa min muwın əm latuənu kit, nərgin u Tamaskes. ¹⁸ Matuwın, matuwın nup kışil kınəhaluwa minəhaluwın rəkis un, kən io ematig mitəlig-pən min Jerusalem məmə ekehm Pita. Kən eməsətigən tuwəh, emuatig mios nian fiftin əm. ¹⁹ Kən e nian əh, emehm əm Jemes u, pia Iesu, İərəməbə rəhatat, məto eməsəplanən aposol min u neen. ²⁰ İatən pahrien e niganəmti Uhgın məmə nəghatən u, nıpahrienən, sənəmə neiuən.

1:13: Wək 8:3**1:14:** Wək 22:3**1:15:** Aes 49:1; Kal 2:7**1:18:** Wək 9:26-27

21-22 Eməsətigən tuwəh əpəh ilis Jerusalem. Kən uarisig un, emuwın əpəh nitən Siria ne Silisia. Kən e nian əh, netəmim itəm koatəfak kəm Kristo latuənu pisin pisin min nitən Jutia, (nitən asol rəha Jerusalem), ilat kəməsotəplanən əh io motəruru niganəmtək. 23 Məto kəmoatəto əm namnusən u, netəmim neen kəmoatən məmə, “Suah əpəh in əpəh, rəhatat tikiwir, təmatoh itat o nəfakən, matərəkən nəmegəhən rəhatat, kən mətalkut məmə otərəkən min rəhatat nahatətəən. Məto roiu əh, in min tınatən-iarəp Namnusən Təwir rəha Iesu.” 24 Kən ilat kəmotənwiwi pik Uhgin o natimnat min itəm in təmol e rəhak nəmegəhən, in təməuhlin-pa io ekol nulan.

2

Aposol min neen kəmotegəhan-in wək rəha Pol

1-2 Tatuwin, matuwın minos nup fotin tinuwa minuwın rəkis un, kən Uhgin təməni-pa kəm io məmə ekəike mitalig-pən min əpəh ilis Jerusalem. Kən itimlau Panapas emian kən miat Taetas itiməhal min məhaluwın. Kən eməhaluwın kiet-arəpən Jerusalem, emotuəfimin itimat netəm-iasol min əm rəha niməfak. Nian emotəpələh e nuəfiminən əh, io ematən-ipən wir nəghatən min itəm ekuwin matən-iarəp kəm laihluə min, ilat sənəmə netəm Isrel. Emən-ipən wir natimnat min rafin agin kəm ilat məto-inu esolkeikəən məmə nikilat otəht məmə rəhak nəghatən təsətuatipən, kən moatən rat rəhak wək, tol nat əpnəpən əm lan, noan tikə. 3 Kən e nian əh, nikik təmatəht pik məmə kətah okotəhai io mə ekəike mən-ipən kəm

Iaihlua min, māmā okāike kəhg-ipən ilat. Məto kəməsotənən. Kən io kit u, Taetas, in etəm Kris, sənāmə etəm Isrel, kəsəhg-ipənən əh. Məto ilat kəməsotənən mə okāike kəhg-ipən.

⁴ Nənən rəha nəhg-ipənən təmişipən e netənim neen kəmoateiuə əm māmā ilat piatat min. Kən ilat kəmotalkəlik wır māmā okotehm-tu māmā itimat ekoatətu-pən əh Lou, o kəp. Məto itimat enotiet rəkis minotuwin o Iesu Kristo, kən minotol kitiah itimat min, kən itimat sənāmə slef rəha Lou. Məto netəm min əh, nikilat təməsagienən o rəhatimat nəghatən min, kən motolkeike māmā okotəgo-pən itat rafin e Lou ne kastom rəha nəfakən rəha netəm Isrel. Kən kəmotən māmā okāike kəhg-ipən Iaihlua min tahmen e Taetas. ⁵ Məto emotən-iahau ilat məsotolən māmā rəhalat nəghatən otər maprəkis-in rəhatimat. Kən itimat emotaskəlim əskasik nəghatən pahrien tətətig e Namnusən Təwir, māmā itəmat onəkotitun wır.

⁶ Kən netənim neen əh-ikin katən ilat māmā ilat netəm-iasol min rəha niməfak, (məto e nehmən rəhak, etəm tatos nərig asol, ne etəm təsosən nərig asol, ilau kuahmen ahmen əm. Kən e niganəmti Uhgın, in təsafinən nərig min əh). Kən netəm min əh kəməsotəgətuənən io e nəghatən wi kit, māmā ekuwin mamnus-iarəp. ⁷⁻⁸ !Kəpə! Kəməsotolən, məto-inun ilat kəmotitun əm māmā, e nəsanənən rəha Uhgın, in təmiləs-ipər io māmā io aposol, kən mitaləpis-pən io mə ekuwin mən-iarəp Namnusən Təwir kəm Iaihlua min. Kən e nəsanənən əh, tiniləs-ipər rəkis mihin Pita, māmə in min in aposol. In otatən-iarəp Namnusən Təwir kəm netəm Isrel.

⁹ Kən Jemes ne Pita* ne Jon, katən iləhal məmə nəukəti niməfak miləhal. Nian kəməhaləplan, kən məhalitun məmə e nəwīrən rəha Uhgin, in təmos-ipa wək u e nelmək. Kən kəhaluwa məhalol sekhan etimlau Panapas məmə itimat ekotol əm kitiah. Kən emotən mə oekotoor wək min. Itimlau oekian muamnus-iarəp Namnusən Təwīr kəm laihluə min, kən iləhal okəhaluwīn məhalən-iarəp kəm netəm Isrel. ¹⁰ Kən ilat kəmotən-ipa əm nəghatən kitiah əm məmə nikitimlau otəkəike matəht ian-rat min əpəh Jerusalem məmə ekuasitu elat. Məto, nikik tinagien rəkis o wək əh.

Pol təməhai Pita

¹¹⁻¹⁴ Kən uarisig un, emitəlig-pən əpəh ləhau taon kit Antiok. Nian emətatig ikin əh, kən Pita təmuarisig min muwa. Kən Pita təmətagwən ilat in min neen koatəfak, məto ilat laihluə min. Kən nian netəmin min rəha Jemes, itəm kəmotisi-pən Jerusalem motiet-arəpa, ilat kəmotəhai Pita, motəmə, “Iaihlua min u, okəike kəhg-ipən ilat. Məto okəmə kəsolən, Uhgin okol təsasituən elat.” Kən nəghatən u kəmoatən təmərəkin Pita, mol taulis kən məgin nuwīn minən magwən təlmin netəm kəsəhg-ipənən ilat. Kən nolən rat əh Pita təmol, miuw e kitat min neen əpəh Antiok, ilat iəfak min u noanol min rəha Isrel, ilat min kəmos o Pita moatol nolən rəha etəmin itəm tatəghat e nolən kəiu, kən moatəgin netəm kəsəhg-ipənən ilat. Motatig kiuw min e Panapas, təgin min ilat. Kən e nian eməplan məmə ilat kinəsotətəu-pən ətuatipən

* **2:9:** Nəghatən Kris ətuatip tatən nərgi Pita ikin-u məmə, “Sifas.”

2:10: Wək 11:29-30

suatip itəm Namnusən Təwır tatən, kən eməhai-pən əm Pita e niganəmtilat, matən-ipən əskasik məmə, “Nat əpnapin ik etəm Isrel, məto nəsosən əh rəhatat nolən. ?Kən tahro natəkəike kəm netəm min u kəsəhg-ipənən ilat məmə okəhg-ipən ilat?”

Etənim itəm otatəhatə e Iesu, Uhgin in otasitu lan

¹⁵ Kən e nian əh, io emən-ipən wır kəm Pita məmə nıpahrienən məmə itımlau emiasipən ətuatip e noanol rəha netəm Isrel. Itımlau sənəmə laihluə mil itəm netəm Isrel nıkilat tatəht məmə ilat rafın nol təfagə məto-inu kəsotətəu-pənən e lou. ¹⁶ Məto roiu ekiatun məmə Uhgin təsafinən etənim kit məmə in tətuatip e niganəmtin məto-inu in tatətəu-pən ətuatip Lou rəha netəm Isrel. Etənim itəm tətəhatətə pahrien e Iesu Kristo, in əmun tətuatip e niganəmti Uhgin. Nətəligən əh in əh, tol itimat min netəm Isrel, oekotəkəike motəhatətə əm e Iesu Kristo məmə ekotətəuatip e niganəmti Uhgin. Uhgin təsafinən itimat məto-inu ekotətəu-pən Lou, məto in tətəfin əm itimat məto-inu ekotəhatətə e Iesu Kristo. Etənim kit okol təsətəuatipən e niganəmti Uhgin məto-inu in tatətəu-pən pık Lou.

¹⁷ Itimat u netəm Isrel, kən ekotəhatətə e Iesu Kristo məmə ekotuwa motətəuatip e niganəmti Uhgin. Məto netəm Isrel neen, nıkilat tatəht məmə itimat nol təfagə məto-inu esotətəu-pənən lou. ? Tol nəhlan, in Kristo itəm tatol məmə itimat nol təfagə, o kəp? !Kəp! Sənəmə tol min nəhlan.

¹⁸ Məto təfagə pahrien in tol min nulan, okəmə ekıtəlig-pən min matətəu-pən lou. Okəmə ekatol min nəhlan, kən io esətəuatipən e niganəmti Uhgin.

Nolən əh tatəgətun əsas əm məmə io iol təfagə rat. ¹⁹⁻²⁰ Tol nəhlan məto-inu, nian emalkut pik o nətəu-pənən Lou, kən eməplan məmə nolən u təsahmenən məmə tatol io ekətuatip e niganəmti Uhgin. Tol nəhlan, emapəs nətəu-pənən Lou o nuwamən etəm ətuatip. Tahmen məmə emimis, kən roiu e nəmegəhən wi rəhak, Lou təsərəməərən lak. Emol nəhlan məmə ekol əm nətəligən rəha Uhgin. In tahmen məmə itimlau Kristo, kəmətu-pər itimlau min e nig kəməluau. Nəmegəhən oas rəhak təmis. Məto emaiir-pa min itimlau Kristo. Kən roiu u, sənəmə io iatəmegəh, məto Kristo in tatəmegəh e nīkik. Kən e nəmegəhən rafin rəhak, ekətəhatətə əm e Nəti Uhgin, itəm təmolkeike pik io, kən muwa mīmīs mos megəh io. ²¹ Nolkeikeən u, Uhgin təməwte-in-pa kəm itat, in iahgin pik. Kən okol esərəkinən nolkeikeən əh itəm Uhgin təməwte-in-pa əpnəpən əm. Məto iatəplan məmə itəmat min neen, nəkoatətəu-pən Lou mə otol itəmat nəkotətuatip e niganəmti Uhgin. Məto okəmə nəkoatol nəhlan, kən itəmat nəkotol nat əpnəpən əm e nīmīsən rəha Iesu Kristo

3

Netəm Kalesia kəmotapəs suatip

¹ !Netəm Kalesia, itəmat nīnotalməl pik! ?Pah təmasig itəmat matuwīn e suatip eko-eko nəhlan? Emotən-iarəp wir pap kəm itəmat məmə Iesu təmos nahməən e rəhan nīmīsən otəmat, məto tahro? ?Okəm-naka suah kit təmos-ipən-os-ipən kəm itəmat kən miuw rəkīs itəmat mol itəmat nīnotalməl pik? ² ?Otən-tu kəm io məmə, Uhgin

tamos-ipinā Narmin Rəhan kəm itəmat məto-inu itəmat nakotətəu-pən Lou, o kəp? Kəpə, in təmos-ipinā kəm itəmat məto-inu itəmat nakotahatətə e Namnusən Təwir rəha Iesu Kristo. ³ ?Tahro? ? Nakotalməl pīk nəpō lan? Itəmat nəmotətuoun wir nəmegəhən wi rəhatəmat e Iesu Kristo e nasituən rəha Narmin Rəha Uhgīn, kən məto roiu, itəmat nīnotalkut māmə onəkotapəs, kən motuwa netəm ətuatip e rəhatəmat əm nəsanənən. ⁴ Nəmoatəto nahməən tepət məto-inu nəmotahatətə e Namnusən Təwir. ?Nəmotəto nahməən əh əpnapīn əm? Kəp, nahməən əh sənəmə rəha nat əpnapīn əm. ⁵ Narmin Rəha Uhgīn təməsolən nat pispīs mīn kəm itəmat məto-inu nəkoatətəu-pən Lou. In təmol məto-inu itəmat nəmotəto Namnusən Təwir rəha Iesu Kristo kən itəmat nakotahatətə lan.

Nətu-pənən Lou, ne nahatətəən e Iesu

⁶ Otətəligin-tu nat kit oekən. Suah kit, Epraham, itəm Naoa Rəha Uhgīn təməghat-in-iarəp rəkīs minū lan māmə:

“Epraham in təmahatətə əskasik e Uhgīn, kən tol nəhlan, Uhgīn təmən māmə in tətəuatip e nīganəmtīn.”

⁷ E suatip kitīəh əm, netənim itəm koatahatətə e Uhgīn, in tətəfin ilat māmə kotahmen e noanol ətuatip rəha Epraham.

⁸ Naoa Rəha Uhgīn təmən rəkīs aupən māmə Uhgīn otos Iaihlua mīn, kotuwa ron mol ilat kotətuatip e nīganəmtīn e nahatətəən rəhalat. Aupən, Naoa Rəha Uhgīn təmən-iarəp nəghatən wir kit kəm Epraham māmə:

“Otisi-pən e rəham noanol, kən ekawte-in rəhak nəwīrən e netəmim rəha noanol min rafin e nətueintən.”

⁹ Kən Uhgin təmawte-in rəhan nəwīrən kəm Epraham mətə-inu in təmahatətə əskasik lan. E suatip kitiah min əm, Uhgin titun nawte-inən nəwīrən kəm netəmim itəm koatahatətə pahrien lan.

¹⁰ Mətə netəmim min un, itəm nikilat tatəht məmə ilat okotos nəmegəhən mətə-inun ilat koatətəu-pən rafin nat naka itəm Lou tatən, netəm min əh, ilat kinotatig rəkis e nelmi nərātən. Tahmen-pən əm e Naoa Rəha Uhgin tatən məmə:

“Netəmim itəm kəsotol ətuatipən natimnat min rafin itəm kotatig e naoa rəha Lou, ilat kinotatig rəkis e nelmi nərātən, kən okotəkəike motos nalpinən kit.”

¹¹ Kən tol nəhlan, tətuatip əm o kitat məmə suah kit tikə itəm tatuwa tətuatip e niganəmti Uhgin mətə-inu in təmətəu-pən Lou, mətə Naoa Rəha Uhgin tatən min-nulan məmə:

“Etəmim itəm tətahatətə e Uhgin, in tatuwa tətuatip e niganəmtin, kən in otos nəmegəhən pahrien.”

¹² Nəghatən əh, tatəghat-in nahatətəən rəhatat e Uhgin. Nolən rəha nətəu-pənən Lou, in təsahmen-ahmenən e nolən rəha nahatətəən e Uhgin. In əh, mətə-inu nolən rəha nətəu-pənən Lou, tahmen-pən əm nulan, Naoa Rəha Uhgin tatən məmə:

“Etəmim itəm tolkeike məmə otos nəmegəhən pahrien mətə-inu tatətəu-pən ətuatip Lou,

in otəkəike mol natimnat min rafin agin itəm Lou tatən.”

¹³ Netəmim rafin agin kəsotol ətuatipən nat naka itəm Lou tatən. Tol nəhlan, Lou in təmələhəu nalpınən tətətig o kitat rafin, kən kitat rafin kotatig e nəlmi nəratən. Məto Iesu Kristo təmimis e nig kəməluau, kən miuw rəkis kitat e nəlmi nəratən əh. Iesu in təmos nalpınən otat tahmen-pən əm e Naoo Rəha Uhgin tatən məmə:

“Etəmim kit, itəm kəməhamnu kətu-pər e nig, nolən əh tatəgətun-pən məmə Uhgin in təmol nalpınən kəm in.”

¹⁴ Məto roiu, Iesu təmimis nəhlan məmə netəmim əpnəpın min rafin, ilat okotatig e nəwırən itəm Uhgin təmən kəm Epraham məmə, in otos-ipən kəm noanol min rəhan. Kən nat əh tol nəhlan məmə inu roiu kitat netəm kotahətətə e Iesu, kitat kotitun nosən Narmin Rəha Uhgin itəm Uhgin təmən məmə otos-ipən kəm netəmim.

Uhgin təmaupən mol nəniəkisən rəhan, məto Lou təmuarisig təsafələn

¹⁵⁻¹⁶ Piak min ne winik min, e nəmegəhən rəhatat, kitat kotitun nolən u rəha nəniəkisən. Nian suah kit tatol, okol kəsafələn, kəsətu-pənən kit min. E suatip kitəh əm, Uhgin təmol nəniəkisən kit kəm Epraham o rəhan kit noanol. Kən e nəghatən əh, təməsənən məmə Uhgin təmən-iəkis noanol min rafin rəha Epraham, məto təmən əm məmə etəmim kitəh əm otisi-pən e rəhan noanol, etəmim u, in Iesu Kristo. ¹⁷ Kən rəhak nəghatən, nipətin tol nulan məmə, aupən, Uhgin təmən-iəkis məmə

otətaskəlim nəghatən rəhalau Epraham, məto uarisig nup fo-hanrit-tate təmuwin rəkis, kən Lou təmuwa. Məto Lou əh, okol təsərəkinən nəghatən itəm in təmən kəm Epraham, okol təsafələn nəniəkisən rəha Uhgın. ¹⁸ Kən okəmə kitat kotatig e nəwırən rəha Uhgın məto-inun kitat koatətəu-pən Lou u, tatəgətun-pən məmə nəniəkisən itəm Uhgın təmol aupən in nat əpnəpən əm. Məto təsolən nəhlan. Məto-inu kitat kotəplan Epraham in təmətatig e nəwırən mın rəha Uhgın məto-inu in təmaskəlim-iəkis nəniəkisən rəha Uhgın.

Lou rəhan əh-ikin wək

¹⁹ Suah kit otəpanətapəh məmə, “? Okəmə tol nəhlan, kənu Uhgın təmos-ipən Lou kəm Moses o naka?” Kən ekitun nənən kəm itəmat u-roiu məmə nəniəkisən itəm Uhgın təmol kəm Epraham in təmaupən matig, məto Lou in təmuarisig in. Təmuwa məmə otəgətun əm kitat netəmim məmə okotitun məmə kitat nol təfagə rat. Məto Uhgın təmələhəu Lou əh məmə otatig matuwın matuwın mətoarus etəmim u noanol rəha Epraham otaiir-pa otat. Kitat kotitun məmə Lou əh, rəhan wək təwır, məto nikitat otəkəike matəht məmə Lou əh, Uhgın təmaupən mos-ipən kəm nagelo mın, uarisig təpanos-ipən kəm etəmim kit u Moses. Moses, in suatip o nos-ipa mın Lou kəm itat. Məto nian Uhgın təmol nəniəkisən ilau Epraham, təməsolən nəhlan. ²⁰ Uhgın in təməsolən suatip kit məmə suah un otəghat kəm Epraham. Məto in ətuatip əm təməghat mən-ipən nəniəkisən rəhan e niganəmti Epraham.

²¹ Kən sənəmə Lou əh təmuwa mə otərəkən nənəkisən rəha Uhgîn. Kəpə, təsolən nəhlan. Okəmə Lou titun nos-ipamən nəmegəhən wi kəm kitat, kən kitat kapotitun nuwamən kətuatip e niganəmti Uhgîn. Məto təsol mihinən. ²² Məto Lou kit tol nəhlan tikə. Məto-inu Naoa Rəha Uhgîn tatən məmə nolən rat təməlis rafin kitat. Kən kitat rafin koatətgəhl Lou min. Tol nəhlan məmə, suatip kitiah əm məmə kitat okotos nəwîrən min rəha Uhgîn itəm təmən-îəkis rəkis. Kən suatip u məmə koatahatətə e Iesu Kristo.

Nian u-roiu rəha nahatətəən e Iesu Kristo

²³ Aupən, Lou itəm Uhgîn təmos-ipən kəm Moses, in təmataskəlîm kitat tiəkis, tahmen əm mə kitat kəmotatig e kalapus, mətoarus-pa u-roiu, Uhgîn təmerəh e niganəmtitat kotəplan suatip rəha nahatətəən. ²⁴ Kən Lou əh, in tahmen əm e etəm-iasol kit itəm təmatərəmərə etat, muwa mətoarus-pən nian Kristo təmuwa, məmə e nian əh, kitat kînotuwa motətuatip e niganəmti Uhgîn, məto-inun, kitat kəmotahatətə lan. ²⁵ Məto roiu əh, Lou okol təsərəmərə minən etat, məto-inun nian rəha nahatətəən e Iesu Kristo tînemüwa rəkis.

Itəmat rafin kitiah əm e Iesu

²⁶ Kən məto-inun itəmat nəmotahatətə e Iesu Kristo, itəmat rafin, nenəti Uhgîn min. ²⁷ Kən kînol baptais rəkis etəmat, məmə itəmat nako-tuwa motol kitiah itəmat min. Tol nəhlan məmə, itəmat ninotos nolən wir min rəha Iesu tahmen əm məmə nəmotəlpin nîpətitəmat e natîmnat wi. ²⁸ Kən itəmat rafin agîn nəmotuwa motol kitiah

itəmat Iesu Kristo, kən itəmat rafin ninotahmen əm. Təwīr məmə kitat kəsotoor minən netənim, nat əpnapin okəmə in etəm Isrel o in Iaihlua kit, in slef kit o in sənəmə slef kit, in iərman kit o in pətan kit. ²⁹ Itəmat rafin netənim rəha Iesu. Tol nəhlan, itəmat noanol min pahrien rəha Epraham. Kən e suatip kitiah əm, nəwīrən min itəm Uhgīn təmən-iəkis kəm Epraham, itəmat onəkotos motatig lan.

4

Kitat nenəti Uhgīn

¹ Roiu əh, oekəghat məsin min e nolən rəhatat, oekən muəh nimaa nəghatən lan. Okəmə suah kit, in otimis kənu nətin in otos rəhan nəwīrən min rafin, məto okəmə nətin tatəkəku əh, kənu kol təsosən nəwīrən rəhan. Nətin tahmen əm e slef kit, nat əpnapin rəhan nəwīrən min rafin. ² In otəkaike mətatig əm e nelmi rəhan min, tatuwin matuwin mətoarus-pən nian rəhan tata təmən in minitun nosən natimnat min itəm rəhan tata təmələhəu kəm in. ³ Kənu kitat min kotahmen-pən əm nəhlan. Aupən kitat kotahmen əm e suakəku əh. Kitat slef min rəha iərmis min itəm kəmoatərəməmə etat. ⁴ Məto tinuwa e nian ətuatip itəm Uhgīn təmən, kən Uhgīn təməhl-ipa nətin tuwa, pətan kit təmiləs taiir-pa e nətueintən, kən in matətəu-pən wīr natimnat rafin itəm Lou in tatən. ⁵ Təmol nəhlan məmə otikis rəkis kitat u, Lou təməlis ətain itat, kənu Uhgīn otəhl kitat, miləs-irəkis kitat tahmen əm e nenətin ətuatip min.

⁶ Kənu roi u əh, Uhgīn tolkeike məmə in otol pəs kitat kotitun məmə kitat nenətin min, təməhl-ipa

3:28: Rom 10:12

3:29: Rom 4:13

4:3: Kol 2:20

4:5:

Jon 1:14; Rom 1:3

Narmin rəha Nətin təmuwa e nikitat min rafin, kən matol itat kotaun-in Uhgın məmə, “Tata.” ⁷ O nat əh, kitat sənəmə slef min əm, məto kitat nenəti Uhgın pahrien min. In tatos-ipa natımnat wır min kəm kitat, itəm in tinəmən rəkis məmə otos-ipən kəm nenətin min.

Pol nikin titahmə o netəm Kalesia

⁸ Aupən itəmat nəmotəruru Uhgın. Itəmat nəmoatəfak əm iərmis min məmə rəhatəmat uhgın min, ilat kəmotəlis ətain itəmat, məto ilat sənəmə ilat uhgın pahrien min. ⁹ Məto roiu əh, ninotitun Uhgın. O təwır ilə məmə ekən nəhlan məmə Uhgın tinitun rəkis itəmat. ?Məto ekolkeike məmə ekətapəh-tu otəmat məmə nəkotitəlig-pən min o iərmis min o naka? Rəhalat nəsanənən tikə, kənu kol kəsotolən-ta nat wır kit kəm itəmat nian kit ne. Təhrol nakotəmə ilat okoatəlis min itəmat? ¹⁰ ? Təhrol itəmat nakotətəu-pən nətuakəmən rəhalat e nian min rəhalat, ne məwig min rəhalat, ne nian asim min, ne nup min rəhalat o naka? ?Nikitəmat təht məmə okol Uhgın nikin tagien otəmat ron? ¹¹ ! Kəsi nəman! !Io ekatəgin agin otəmat! !Ekatəplan mə emol wək pik etəmat o nat əpnapin əm!

¹²⁻¹³ Piak min ne winik min, io ekatən əskasik kəm itəmat məmə, aupən itəmat nəməsotatigən e Lou kit, kən io emuwa mehm itəmat koatətig, emos nolən rəhatəmat. Eməsətəu-pənən Lou. Kən roiu, ekolkeike məmə itəmat min onəkotos nolən rəhak, ekəsolən məmə Lou otaskəlim pik io tiəkis. Itəmat nikitəmat təht u, aupən nian io ematən-iarəp Namnusən Təwır kəm itəmat, məto-inu nimisən rəhak təmol, kən ekətətig kitat min

itəmat. Məto nat əpnapin məmə io ematimis e nian əh, məto itəmat nəməsotolən io ekəto tərət. ¹⁴ Nəmisən rəhak təmaləkiamtə itəmat, məto itəmat nikitəmat təməsəht ratən io, kən məsotən ratən io. Itəmat nəmoatos wir io moatuwin e nıpəg noanimə min rəhatəmat, təhmen əm məmə io nagelo kit rəha Uhgın, o io, io Iesu Kristo.

¹⁵ Aupən, itəmat nəmoatolkeike pik io, eməplan məmə okol napotitun nolən nat u, napotos-iarəp əm niganəmtək u tərət, kawluin ilau itəm təwir kit rəhatəmat, pəs tasitu lak. ?Məto tinahrol əh-roiu? ¹⁶ Nənikik təht məmə, okəmə naka nəghatən min pahrien rəhak təmol itəmat nakotetəhau io.

¹⁷ Iəgətun eiua min un, koatalkut pik məmə onəkotəuhlin rəhatəmat nətəligən moatətəu-pən ilat. Məto ilat kəsotolən məmə otasitu etəmat. Kotolkeike əm məmə okotiuw rəkis itəmat ron io məmə itəmat onəkotalkut pik o nətəu-pənən ilat. ¹⁸ In nat təwir məmə nakotalkut pik o nolən natimnat, məto nəkotəkəike motalkut o nat itəm in təwir, nat əpnapin ekətətig kitat min itəmat, o esatigən kitat min itəmat.

¹⁹ Io min neen, io iatəto tərət agın-əh otəmat təhmen-pən əm e pətan itəm mənətan tinatahmə məmə otemək, matuwın matuwın mətoarus itəmat nakotos nolən ətuatip rəha Iesu Kristo e rəhatəmat nəmegəhən. ²⁰ Ekolkeike pik məmə ekətətig kitat min itəmat u-roiu məto-inu okəmə ekətətig, okol esagət pikən etəmat. Məto roiu etətig isəu otəmat nəhlan, kən məruru mə ekahrol nulan masitu etəmat.

Namsu rəha Heka ne Sera

²¹ Itamat netəm nakotolkeike pik nətəu-pənən Lou, onəkotuhalpın-tu rəhak nəghatən. ?Nəmotəto rəkis nat naka itəm Lou tatən, o nəsoṭətoən əh? ²² In tatən Epraham itəm təmiləs nətin iərman kəiu. Kit itəm slef rəha pətan rəhan təmiləs, kən kit rəhan pətan ətuatip təmiləs, sənəmə in slef mətə pətan əh rəhan. ²³ Suakəku itəm pətan slef təmiləs in təmaiir e nətəligən əm rəha netəmim. Mətə suakəku itəm pətan ətuatip əh rəhan təmiləs, in təmaiir mətə-inu Uhgin in tinəmən-iəkis rəkis məmə pətan əh oṭiləs. ²⁴⁻²⁵ Kən kitat kotitun nənən namsu rəha pətan mil əh kən motəuhlin-pa nīpətin etat. Pətan mil əh ilau katuəgətun nənən mil itəm Uhgin təmol kəm netəmim. Pətan u Heka, in ne nətin min ilat slef min əm, okətaləkiəmtə ilat. Kən pətan əh Heka, in tahmen e nənən itəm Uhgin təmol e nītot Sinae əpəh e nītən asol Arepia, ikin əh inəh Uhgin təmos-ipən Lou ikin kəm Moses. Kən in tahmen min e taon asol kit u Jerusalem itəm netəm ikin kotaskəlim əskasik Lou, kən ilat kotahmen e slef min itəm Lou tatəlis ətain ilat. ²⁶ Mətə Jerusalem kit min əpəh ilis e neai, in tahmen e pətan itəm sənəmə slef, itəm Lou təsəlis ətainən, kən in mama rəhatat. ²⁷ Inu nəghatən kit e Naoa Rəha Uhgin tatən nəhlan məmə,

“!Ik u inu, nīməgi-nig, agien!

Ik u inu, nəməsətoən nahməən kit o neməkən, agət əfəmə, mətə-inun nīkim tətagien!

Ik nəməsiləsən suakəku nian kit ne, mətə roiu əh, nənətim min tinol tepət tepət agin,

4:22: Jen 16:15; 21:2
Nol Əpən 21:2,10

4:23: Rom 9:7-9

4:26: Hip 12:22;

taprækis-in nenəti pətan itəm rəhan iərman təsapəsən.”

²⁸ Piak min ne winik min, itəmat nenəti Uhgín min mətó-inun tāmən-iəkis māmə otol mihin. Itəmat onəkotahmen e Aisak u aupən, nəti Sera.

²⁹ Kən aupən suakəku u Ismael, nəti Heka, itəm təmaiir e nətəligən əm rəha netəmim, in təmatərəkín pik suakəku u Aisak itəm təmaiir e wək rəha Narmin Rəha Uhgín. Kənu roiu ne, nolən əh tatuwin əm nulan, ilat itəm slef rəha Lou koatərəkín kitat itəm kəmotaiir wi e Narmin Rəha Uhgín e nahatətəən. ³⁰ ?Mətó Naoa Rəha Uhgín tāmən māmə naka? In tāmən māmə,

“Ik onakəkəike mahl-iarəp pətan un slef ne nətín.

Ilau kuagim rækis u ikin-u, mətó-inun, nəti pətan əh, in okol təsosən nəwírən kit rəha tata. Nəwírən min rafin rəha tata otuwin kəm nəti pətan itəm sənəmə slef.”

³¹ Mətó kitat u, kitat sənəmə nenəti pətan slef, kitat nenəti pətan itəm sənəmə slef.

5

Iesu təmikis rækis rəhan min netəmim

¹ Nian Iesu Kristo təmikis rækis itat, təmol kitat māmə Lou təsəlis ətainən kitat. O nat əh inəh, itəmat onəkotəike motətul əskasik. Sotətəu-pənən Lou, māmə otərəmərə etəmat. Lou əh, titaləkiamtə itəmat, māmə itəmat onəkotuwín motol wək min rəhan.

² Otətəlig-in-tu io. Io Pol iatən nəghatən u kəm itəmat. Okəmə itəmat onəkotegəhan māmə ilat okotəhg-ipən itəmat, kənu nat u itəm Iesu təmol

təsasitu aɡinən etəmat. ³ Kən io iatagət əskasik otəmat məmə etəmim itəm otegəhan məmə okəhg-ipən in, in otos-ipən atip əm in e nelmi Lou. Kən etəmim itəm tətətig e nelmi Lou, otəkəike matətəu-pən rafin aɡin natimnat min itəm Lou tatən məmə otol. ⁴ Itəmat u, itəm nakotalkut-alkut o nətəu-pənən Lou məmə otol itəmat nəkotətuatip e niganəmti Uhgın, itəmat ninotəte rəkis atip itəmat o Iesu Kristo. Itəmat ninotəhən-ipən rəkis mənətaətat o nəwırən rəha Uhgın. ⁵ Kən məto kitat u, okotələhəu-pən əm rəhatat nətəligən e Uhgın, pəs in otol kitat kotətuatip e niganəmtin, məto-inun kitat kotahatətə əm e Iesu Kristo. Kən Narmin Rəha Uhgın, in otol itat koatətul əskasik kən motəsaħgın mətoarus nat un otiet-arəpa. ⁶ Nian kitat kotuwa motakul-pən e Iesu Kristo, nat əpnəpin okəmə etəmim kəməhg-ipən o kəsəhg-ipənən, məto nat asol un, in rəhatat əm nahatətəən e Iesu Kristo. Nahatətəən əh, in tol kitat kotalkeike Uhgın, motətig katol min nolkeikeən kəm netəmim min.

⁷⁻⁸ Aupən, eməplan itəmat kən mitun məmə itəmat nakotaiu əsanən e suatip ətuatip e nəmegəhən rəhatəmat, məmə nakotətoarus mak, məto roiu, nəmotitəlig. Uhgın təmaun-in rəkis itəmat. ?Tol nəhlan, ekolkeike məmə ekətapəh-tu məmə, pah min kotaiuosig e rəhatəmat suatip, moatiuw kalin itəmat məmə onakoatətəu-pən min Lou? !Ekitun məmə okol Uhgın təsən-iəhauən itəmat nəhlan!

⁹ In təhmen e nəghatən kit itəm katən nulan məmə, “İlat kəmotis noanig rat kit, tinatəwiə, matərəkın nətəligən rəhatəmat.” ¹⁰ Məto ekitun

məmə nɪpahrienən ləɾəmərə in otol nətəlīgən rəhatəmat tuwa mɪn mol kitɪəh kitat mɪn io. Kən io ekitun wɪr məmə etəmim u itəm tatərəkɪn rəhatəmat nətəlīgən nulan, nat əpnəpɪn in etəm-iasol o in etəm ahrol kit, məto Uhgɪn otol nalpɪnən kit kəm in.

¹¹ Piak mɪn ne wɪnɪk mɪn, nəghatən neen itəm katən məmə io, ekatən-iarəp əh məmə netəm kəmotahatətə e Uhgɪn okəike kəhg-ɪpən ilat məmə Uhgɪn otasitu elat. Məto nəghatən əh, sənəmə nɪpahrienən. Okəmə io ekatən-iarəp nəhlan, kən netəm mɪn u itəm koatan itəmat mɪn ilat, nɪkilat otəgɪen əm ron io. !Məto otəplan-tu! Netəm Isrel neen, koatərəkɪn əh io, koatitəp io, moatoh io, məto-inun io iatən-iarəp məmə nɪmɪsən rəha Iesu e nɪg kəməluau, in əm un, in otosmegəh kitat. ¹² ! E rəhak nətəlīgən, netəm mɪn un itəm koatərəkɪn nətəlīgən rəhatəmat moatən məmə okəike kəhg-ɪpən itəmat, təwɪr məmə ilat okotuwin motətə-atɪp ilat mɪn!

¹³ Məto piak mɪn ne wɪnɪk mɪn, Uhgɪn təmaun-in itəmat, kən mɪkɪs rəkɪs itəmat, məmə Lou itəm Uhgɪn təmos-ɪpən kəm Moses in otəsəlɪsən itəmat. !Otətə wɪr itəmat! Nɪkitəmat otəsəhtən məmə, “Təwɪr, io enəgɪm rəkɪs e Lou əh. Roiu əh, io ekitun nolən natɪmnat rafɪn itəm nɪkɪk tolkeike.” Itəmat, onəkəsotənən nəhlan. Məto nolkeikeən rəhatəmat otəkəike mol itəmat nɪkitəmat tagɪen məmə onəkotasitu etəmat mɪn.

¹⁴ Nolən əh, in tatətəu-pən wɪr nəghatən kit rəha Lou, u itəm titərgəfɪmɪn rafɪn nəghatən pɪsɪn pɪsɪn mɪn rəha Lou, in tatən məmə, “Ik, onakolkeike

netəmim rafin, kən matol təwir kəm ilat, tah-men əm mə ik nakatol atip kəm ik.” ¹⁵ Itəmat onəkotəkəike katəto wir itəmat. Okəmə itəmat nəkoatol tıməht kəm itəmat mīn, nəkotahmen əm e kai mīn, koatus atip əm ilat mīn, kən nəghatən rəhatəmat otərəkin itəmat.

Nolən rəha Narmīn Rəha Uhgīn ne nolən rəha netəmim

¹⁶ Io, ekolkeike mə ekən nəghatən kit kəm itəmat. Itəmat, Narmīn Rəha Uhgīn otəkəike matit itəmat kən itəmat nakotətəu-pən, kən itəmat məsotosən nolən rat aupən rəhatəmat, itəm nəmos kəiir-pa. ¹⁷ Nolən rat aupən əh, inun, nəkoatol natimnat tərət itəm nikitəmat tolkeike. Məto nolən əh, in tetəhau nolən rəha Narmīn Rəha Uhgīn. Kən Narmīn Rəha Uhgīn in təsolkəike mīnən nolən rat aupən kəmos kəiir-pa moatol. Nolən mil əh kətioal təməht kəm ilau mīn, kən tatol məmə nəkəsotolən nolən wir mīn itəm nakotolkəike məmə onəkotol. ¹⁸ Sotaluinən nat kit, okəmə Narmīn Rəha Uhgīn tatit itəmat, kənu Lou in təsəlis ətain mīnən itəmat.

¹⁹ Kitat kotitun əm nolən rat aupən rəha netəmim itəm kəmos kəiir-pa moatol. Nipitan ne nəman ne, koatit anion ilat mīn; kən ilat koatol nolən rat rafin itəm tol naulisən o nənən; rəhalat nətəligən tatuwin pik o nolən rat mīn əh. ²⁰ Ilat koatəfak kəm narmi nat mīn, moatəmīk nərik, moatos təmafah rat mīn, moatol kilepa, ne. Kənu moatol mīn tıməht, moatəmu, moatetet, moatol neməha, moatos-ipər atip əm ilat, moatoor ilat mīn, kən okəmə rəhalat nətəligən tol pisin pisin,

kən ilat koatəhai ilat mīn. ²¹ Nīkilat tətakləh-in natīmnat rəha netəm pīsīn, moatənim nənīmən mīn kətapīs lan, kən moatol lafet katagien lan o nolən nat tərāt mīn əm, moatol mīn natīmnat tərāt mīn tol nəhlān. !Iatən mīn tahmən-pən əm məmə emən aupən məmə, oatəto wīr itəmat! Məto netəm koatol nolən mīn əh, okol ilat kəsotuwamən motatīg ahgīn nərəmərəən Rəha Uhgīn itəm tatol əpen-əpenə lan.

²² Məto noa Narmin Rəha Uhgīn itəm tatəwīə e nəmegəhən rəha netəmim rəha Uhgīn, in tol nulan. Ilat koatolkeike netəmim, kən nīkilat tətāgien, kənu nəməlinuən tətātīg e nīkilat, kən rəhalat nətəligən kaifəməh, kən moatasəkitun etəmim, kən rəhalat nolən in təwīr təwīr. Kən netəmim kotītun mə ilat netəm ətuatīp, koatol noa. ²³ Kən ilat netəm mətīg. Kən nian nətəligən rat tatīg elat, ilat kotətul əskasik, məsotolən natīmnat rafin itəm ilat atīp kotolkeike nolən. Nolən mīn u, ilat kotəwīr pīk, kən nəghatən kit tīkə o Lou kit, məmə otən-iəhau itəmat məmə onəkəsotolən natīmnat mīn əh. ²⁴ Kitat u netəm rəha Iesu Kristo, kitat kīnəmotapəs rəkis nolən rat mīn rəhatat, u kəmoatol natīmnat mīn itəm nətəligən əm rəhatat tolkeike. Tahmen əm nulan mə, kəməht-ipən nətəligən rat mīn rəhatat e nīg kəməluau.

²⁵ !Kotəplan-tu! Narmin Rəha Uhgīn in təmos-ipa rəkis nəmegəhən kit kəm kitat, kən təwīr məmə kitat okotaliwək e nolən wīr mīn rəhan. ²⁶ Tərāt məmə kitat okotausit motos-ipər pīk kitat, motiuw-pər nərātən, moatetet kitat mīn.

6

Təwir məmə kotasitu e katipa əfigəm rəhatat mın

¹ Piak mın ne winik mın, okəmə itəmat kit təme e rəhan nəmegəhən, təwir mə itəmat un, Narmin Rəha Uhgin tatit itəmat, onəkotəkəike motasitu lan motəg-ətuatip-in. Məto onəkəsotagət pikən lan, onəkotəghat mətig əm kəm in, motol məmə nikitəmat mın titahmə ron. Məto otəto mın itəmat, məmə nat kitiah əm itəm itəmat nakotən-iəhau etəmim ron, otəseko-pa mınən otəmat. ² Itəmat onəkotasitu nəhlan etəmat mın. Onəkotalis kələh nat əfigəm rəhatəmat mın. Okəmə nəkotol nəhlan, kən itəmat nakotətəu-pən wir nat naka itəm Lou rəha Kristo tatən. ³ Təsəwirən məmə kitat okotos-ipər atip kitat. Okəmə suah kit nikin tatəht mə “Io, io etəm agin-əh kit,” etəmim un, nikin tateiuə-in, məto in təruru məsəplanən məmə in nat əpnəpin əm. ⁴⁻⁵ Məto itəmat onəkotəike motəplan wir-tu natimnat itəm noatol mın. Tol nulan məmə, okol etəmim kit in təsakil atipən rəhan wək ne wək rəha suah kit mın. Məto in otəkəike mehm wir rəhan pisin əm wək aupən. Məto-inun, netəmim rəhalat wək mın tol pisin pisin. Kən ilat koatos katipa əfigəm pisin pisin mın e nəmegəhən rəhalat kitiah kitiah. Məto təwir məmə etəmim kitiah nikin otagien o rəhan wək, okəmə rəhan wək təwir əm.

⁶ Itəmat u, təwir məmə itəmat onəkotawte-in natimnat mın neen kəm rəhatəmat nəgətun mın, itəm koatəgətun itəmat e nəghatən rəha Uhgin.

⁷ Oatəto itəmat, soteiuə-in atipən itəmat mın məmə itəmat nəkotitun nolən nat əpnəpin kit

itəm nikitəmat rat aupən nakotolkeike. Kən okol nəkəsotolən ialmə e Uhgín. Ik nəmis noanig naka e rəham nasumən, kən ik onakəhl atip min noan, mun. ⁸ Etənim itəm tatasum-in nolən rat aupən, itəm kəmos kair-pa moatol, tahmen e noanig rat e rəhan nəmegəhən, in otəkəike məhl noan tərət mun, kənu noanig un, otoi-in, nīpətin u, Nīmīsən. Məto etənim itəm tatis noanig wir, itəm Narmin Rəha Uhgín təmos-ipən, Narmin Rəha Uhgín otol toi-in, noan wir kit, kən in otəhl. Nərgín noanig un, in Nəmegəhən Lilin itəm namnun tikə.

⁹ Sotəpou-inən nolən itəm təwir, məto-inu kitat okotəhl noanig wir əh, e nian ətuatip rəhan, okəmə kəsotapəsən wək. ¹⁰ Kən nian min rafin itəm kotitun nolən, pəs koatol təwir kəm netənim rafin, kən motatig katol tepət min kəm netəm min u kotahmen e piatat min ne winitat min e Iesu Kristo.

Namnun nəghatən rəha Pol təmə nəkəm ilat

¹¹ Oekəte rəkis namnun nəghatən rəhak e naoa e nelmək əm.* Itəmat onəkotəplan məmə letə min rəhak, ilat iahgin min. ¹² Netəm Isrel u koatən məmə okəike kəhg-ipən itəmat, ilat kotausit əm e niganəmtilat min neen o nat u. Məto ilat koatən nəhlan o nat kitəh əm, məmə netəm Isrel neen min okəsotolən nəratən kəm ilat. ¹³ Kən ne nat kit min, netəm min əh, kotolkeike məmə okəhg-ipən itəmat məto-inu kotausit əm məmə okotol win etəmat lan. Kən motiww kalin itəmat, nakotitəlig

6:8: Rom 8:13 * **6:11:** Nian Pol təməte naoa u, in təməghat, kən suah kit min təməte rəhan nəghatən e naoa. Roiu in tatos pen, kən tatəte atip e nelmin.

motuwīn mīn e nelmi Lou rāha netām Isrel. Māto otāplan-tu, ilat mīn kāsotātēu-pān wīrān natimnat mīn itām Lou tatān. ¹⁴ Māto io rāhak, io ekāsān wi atipān io o nat kit itām emol. Māto ekolkeike māmā ekānwiwi ām nat naka Iārāmārā Iesu Kristo tāmōl e nian in tāmimis e nig kāmēluau. O nat āh ināh, nolān mīn rāha nātueintān okol kāsotiuw rākisān rāhak nātēligān, kēnu netām e nātueintān itām kāsotahatātān e Uhgīn, ilat kāsotolkeikeān nolān itām iatātēu-pān. ¹⁵ Okāmā Uhgīn in otol suah kit tuwa in etām wi, kēn in otol suah āh, tātūatip e niganāmtīn, nat āpnāpīn okāmā kāmāhg-ipān o kāsāhg-ipānān. ¹⁶ Kēn roiu, ekatāfak o netām mīn u koatātēu-pān wīr nāghatān u, ilat noanol ātūatip mīn rāha Uhgīn. Iatāfak māmā, pās nāmēlinuān rāha Uhgīn ne rāhan nasākitunān otatig olat.

¹⁷ Rāhak u namnun nāghatān. Io esolkeikeān māmā suah kit otān mīn nat tērat lak. Māto-inun iatāmīk āh nāme nīmāgām itām kāmāht io e kēpiel apīn kēn kāmālis io. Nāme nīmāgām mīn u, tatāgātun māmā io, slef rāha Iesu.

¹⁸ Piak mīn ne wīnik mīn, iatāfak māmā Iārāmārā Iesu Kristo otawte-in rāhan nāwīrān otāmat. Ōwāh.

North Tanna New Testament
The New Testament in the North Tanna Language of
Vanuatu
Le Nouveau Testament dans la langue du Nord Tanna
de Vanuatu

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

46e9a2b5-26b8-5301-a079-623f3a20ef8b